

Aktuelnosti:

1. Vijesti sa 23. Sjednice Vlade FBiH
2. Vlada HNŽ odobrila pomoć Općini Čitluk
3. Informacija sa 7. Redovne sjednice PDPFBiH
4. Urbano planiranje u Jugoistočnoj Evropi
5. INTERVJU: Admir Hadžiemrić, načelnik Općine Travnik
6. Održana radionica u okviru pripreme nastavka Projekta ILDP
7. Travnik i Yalova od danas zvanično prijateljski gradovi
8. Općini Kakanj dodijeljen certifikat 9001:2008
9. Uvođenje LEDIS-a u Općini Tešanj
10. Općina V.Kladuša najuspješnija u FBiH po upisu u RPG
11. Imenovana Interresorna grupa za izradu prijedloga Zakona o koncesijama
12. Započela implementacija sredstava dobijenih emisijom municipalnih obveznica
13. Općina Tešanj promovira najbolje poslovne ideje mladih
14. Općina Bihać, USAID i SIDA nastavljaju uspješnu saradnju
15. Načelnik Hajder jedini načelnik iz BiH koji je prisustvovao konferenciji o energetici u Beogradu
16. U Maglaju boravila delegacija Općine Tovarnik (RH)
17. Održana treća LEAP radionica
18. Fond za zaštitu okoliša FBiH interventno uputio Goraždu 100.000 KM
19. Počeo upis municipalnih obveznica Općine Cazin

23. SJEDNICA VLADE FBiH: UTVRĐEN NACRT ZAKONA O KORIŠTENJU OBNOVLJIVIH IZVORA ENERGIJE I KOGENERACIJE



SARAJEVO, 27. oktobar/listopad – Vlada Federacije BiH je na današnjoj sjednici utvrdila Nacrt zakona o korištenju obnovljivih izvora energije i kogeneracije, kojim se uređuje materija do sada regulisana u istoimenoj uredbi, čije je provođenje ukazalo na određene nedostatke kad je u pitanju kompletnost ove problematike. Ciljevi i definicije zakona usklađeni su sa EU direktivama koje uređuju ovu oblast i sa Zakonom o električnoj energiji.

Za razliku od važeće uredbe, Nacrt zakona, pored električne, uređuje i pitanja vezana za toplotnu energiju, te energiju u oblasti transporta, koje se dobiju iz primarne obnovljive energije.

Uvodi se novi pojam "efikasna kogeneracija", u skladu sa međunarodno usvojenom terminologijom, kao i zbog bližeg određenja kogenerativnog procesa u oblasti korištenja obnovljivih izvora energije.

Propisana je izrada Akcionog plana za obnovljivu energiju u FBiH (APOEF-a) kojim se definišu obavezujući ciljevi Federacije BiH do 2020. godine, definiran njegov sadržaj, obaveza usklađivanja sa elektroenergetskom strategijom Federacije i rok za njegovo donošenje. APOEF je sastavni dio Nacionalnog akcionog plana korištenja obnovljivih izvora energije Bosne i Hercegovine.

Upravni nadzor nad provođenjem ovog zakona, kako je utvrđeno, vrše resorno federalno ministarstvo i FERK, a inspekcijski nadzor Federalna uprava za inspekcijske poslove.

20. Završna rasprava o Radnom materijalu prijedloga Zakona o lokalnoj samoupravi KS
21. Zbog nepovoljne hidrološke situacije manja naknada za Buško jezero
22. Potpisan Sporazum o finansiranju industrijskih zona u Hadžićima, Ilidži, Ilijašu i Vogošći
23. Poticaj razvoja poduzetništva kroz smanjenje cijene zemljišta
24. Iskustva Općine Tešanj: Zakoni sputavaju ulaganje
25. Poziv za dostavu ponuda za izradu programa obuke za izabrane zvaničnike u JLS
26. Raspisan javni poziv za program transnacionalne suradnje SEE
27. NAJAVA obilježavanja Dana općina

Poštovani članovi i čitaoci,

Kao i do sada, obavještavamo Vas o unutrašnjoj i vanjskoj komunikaciji i razmjeni najboljih iskustava i praksi kao i o različitim obukama koje mogu doprinijeti kadrovskom jačanju općinskih službenika.

Putem ovog biltena se možete informirati i o drugim dešavanjima u proteklom periodu kao što su konferencije, seminari, okrugli stolovi a koji mogu doprinijeti unapređenju sistema lokalne uprave.

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: dino@sogfbih.ba

Molimo vas da ovaj elektronski bilten proslijedite svim zainteresiranim u vašoj i susjednim općinama.

Ukoliko želite da objavite neke od vaših novosti, iskoristite elektronski bilten Saveza, koji je brz, efikasan i

ZAKON O KONCESIJAMA

SARAJEVO, 27. oktobar/listopad – Razmatrajući danas realizaciju Zaključaka donesenih prilikom usvajanja Izvještaja o radu Komisije za koncesije u Federaciji BiH za 2010. godinu, Vlada Federacije BiH je zadužila interresornu radnu grupu formiranu u te svrhe da hitno pripremi i dostavi na razmatranje radni tekst zakona o koncesijama FBiH.

Pri tome su resorna federalna ministarstva dužna da Komisiji za koncesije FBiH dostave sve nužne podatke o predmetima za dodjelu koncesija iz svoje nadležnosti, a u cilju izrade jedinstvenog Dokumenta o politici dodjele koncesija, koji je Komisija za koncesije FBiH dužna izraditi u roku od tri mjeseca od usvajanja Zakona o koncesijama Federacije BiH.

U skladu s ovim dokumentom federalna ministarstva su dužna u roku od šest mjeseci od usvajanja Zakona o koncesijama Federacije BiH izraditi sektorske politike o dodjeli koncesija.

Resorna federalna ministarstva će, prema danas usvojenim zaključcima, imenovati interne radne grupe, kako bi u saradnji sa Komisijom za koncesije Federacije BiH, planirale i pripremile studije o ekonomskoj opravdanosti projekata za koje se traži dodjela koncesije.

VLADA HNŽ ODOBRILO POMOĆ OPĆINI ČITLUK ZA SANACIJU ŠTETA OD PRIRODNE NEPOGODE



MOSTAR, 27. oktobar/listopad – Na danas održanom prvom dijelu 74. sjednice Vlade Hercegovačko-neretvanske županije, Vlada je razmotrila izvješće, koje je na temelju zaključka Vlade s 51. izvanredne sjednice, priredila uprava J.P. "Park prirode Hutovo blato", a u kojem su obuhvaćeni svi pokazatelji o obujmu štete nastale nedavnim požarom.

Utvrđivanjem realnih procjena nastalih šteta stekli su se uvjeti za nastavak aktivnosti, prema već ranije donesenom zaključku Vlade, u resornom Ministarstvu trgovine, turizma i zaštite okoliša, Upravi za civilnu zaštitu i vatrogastvo i J.P. "Park prirode Hutovo blato" koji, u koordinaciji s općinama Čapljina i Stolac, trebaju izvršiti potrebne predradnje, koje su preduvjet za donošenje odluke o odobravanju namjenskih sredstava za sanaciju šteta.

Također, Vlada je usvojila Plan utroška novčanih sredstava utvrđenih Proračunom HNŽ za 2011. godinu za Upravu za civilnu zaštitu i vatrogastvo s pozicije namjenskih sredstava za zaštitu i spašavanje, te potom odobrila jednokratnu novčanu pomoć za sanaciju šteta nastalih od olujnog nevremena odnosno tuče Općini Čitluk u iznosu od 120.000 KM.

jeftin način komuniciranja sa
javnošću.

Sa zadovoljstvom očekujemo vaše
komentare, sugestije i primjedbe.

Kontaktirajte nas

Telefoni:

033/ 216 502, 033/ 552 812

Fax: 033/552 810, 033/ 552 811

<http://www.sogfbih.ba>

<http://www.partnerstvogradova.ba/>

e-mail: dino@sogfbih.ba

ZA PRAVNO SAVJETOVALIŠTE:

Selma Fišek, viši saradnik za pravna
pitanja

fax: + 387 33 552 810

selma@sogfbih.ba

ZA FINANSIJSKO SAVJETOVALIŠTE:

Dženita Kovačević, viši saradnik za
finansijska pitanja

fax: + 387 33 552 810

dzenita@sogfbih.ba

NAŠ CILJ je informirati vas o
seminarima, treninzima,
konferencijama i drugim
aktivnostima, koji unapređuju lokalnu
upravu i kadrovsko jačanje zaposlenih
u vašim općinama.

INFORMACIJE SA 7. REDOVNE SJEDNICE PREDSTAVNIČKOG DOMA PARLAMENTA FEDERACIJE BIH



Dana 26. i 27. oktobra/listopada 2011. godine održana je 7. Redovna sjednica Predstavničkog doma Parlamenta Federacije BiH. Na ovoj sjednici usvojen je Prijedlog zakona o dopuni Zakona o utvrđivanju naseljenih mjesta i o izmjenama u nazivima naseljenih mjesta u određenim općinama (Općina Gornji Vakuf/Uskoplje - naseljeno mjesto Trnovača).

Predstavnički dom Parlamenta Federacije BiH prihvatio je Nacrt zakona o finansiranju poslova premjera i uspostavljanja katastra nekretnina, kojeg je utvrdila Vlada Federacije BiH.

Navedeno je da se za ove potrebe osiguravaju sredstva iz budžeta Federacije BiH, kantona i općina na kojem se izvode premjeri, kao i iz doprinosa od investicija za građevinske objekte i naknada za korištenje pokazatelja premjera i katastra nekretnina. Obrazloženo je da bi to značajno rasteretilo budžete svih nivoa, jer bi svi investitori građevinskih objekata uplaćivali po osnovu doprinosa za premjer i uspostavljanje katastra 0,3% od predračunske vrijednosti građevinskih poslova i bez toga ne bi mogli dobiti dozvolu. Tokom sjednice upozoreno je, između ostalog, da se ovim zakonom uvode novi nameti i opterećenja za investitore, te da će djelovati destimulirajuće na strane i domaće ulagače. Predsjedavajući Predstavničkog doma Denis Zvizdić kazao je da investitori, prema postojećim zakonskim rješenjima, moraju platiti ukupno 59 naknada za rad općinskih i federalne uprave, te da je nedopustivo uvođenje novih nameta kao uvjeta za dobijanje građevinske dozvole. Zvizdić je istakao da ovakve zakonske odredbe nisu u skladu sa nedavnom tematskom sjednicom Predstavničkog doma, posvećenoj uklanjanju barijera za razvoj biznisa, na kojoj je zaključeno da je nužno poboljšati poslovni ambijent i omogućiti veći priliv stranih i domaćih investicija. Poslanica Hafeza Sabljaković kazala je da nije dobro opterećivati kantone i općine da izdvajaju budžetska sredstva, bez da prethodno budu konsultirani. Kako je rečeno, nedorečenosti i manjkavosti ovog nacrtu zakona trebaju biti otklonjene u predstojećoj javnoj raspravi koja će trajati 30 dana.

Predstavnički dom prihvatio je i Nacrt zakona o vinu kojim će, kako je kazao federalni ministar poljoprivrede, vodoprivrede i šumarstva Jerko Ivanković Lijanović biti omogućen povoljniji ambijent za razvoj vinarstva i vinogradarstva. Ministar Ivanković Lijanović rekao je da odredbe postojećeg zakona, kojim je

**KORISNI LINKOVI ZA PREDPRISTUPNE
FONDOVE:**

<http://www.southeast-europe.net/en/>

<http://www.adriaticpacbc.org/>

<http://www.interregadriatico.it/index1.html>

<http://www.europa.ba/>

<http://www.cbib-eu.org/en/welcome/index.html>

<http://www.cbc.bih-mne.org/>

<http://www.srb-bih.org/>

<http://www.cbc-cro-bih.net/>

<http://www.programmemed.eu/>

<http://www.tacso.org/>

<http://www.euroinfocentar.ba/>

<http://www.balkanfund.org/>

<http://eurelsmmed.com/>

http://eacea.ec.europa.eu/index_en.php

regulirana ova oblast, nisu provodive u praksi, te da bi bez ovog zakona došlo do daljnjeg propadanja vinarske proizvodnje.

URBANO PLANIRANJE U JUGOISTOČNOJ EVROPI



Pod pokroviteljstvom Regionalnog vijeća za saradnju (RCC), jučer je u Sarajevu održana Regionalna Konferencija o urbanom planiranju u Jugoistočnoj Evropi

SARAJEVO, 25. oktobar/listopad – Regulisanje nelegalno izgrađenih naselja bila je glavna tema konferencije o urbanom planiranju u Jugoistočnoj Evropi koja je jučer održana u Sarajevu.

Konferencija je održana u organizaciji Mreže lokalnih vlasti Jugoistočne Evrope (NALAS), Regionalnog vijeća za saradnju (RCC), Njemačke organizacije za međunarodnu saradnju (GIZ), Saveza općina i gradova Federacije BiH i Stalne konferencije gradova i općina Srbije.

Pozdravljajući prisutne, Jelica Minić, zamjenica glavnog sekretara RCC-a rekla je da će razvoj održive zajednice, strateško upravljanje urbanim planiranjem i pristup kvalitetnom stambenom planiranju igrati ključnu ulogu u kontekstu šireg društveno-ekonomskog razvoja Jugoistočne Evrope. „Glavni prioritet treba dati jačanju mreže vladinih agencija, asocijacija lokalnih vlasti, civilnog društva i akademskih institucija, što će poslužiti kao održiva struktura za regionalnu saradnju“.

Na konferenciji su predstavljeni, te diskutirani rezultati projekta "Komparativna analiza zakonskih okvira relevantnih za urbanizam u regiji Jugoistočne Evrope" od strane nosilaca projekta Stalne konferencije gradova i općina Srbije. Cilj projekta bio je usporediti i procijeniti relevantne zakone u Jugoistočnoj Evropi, te dati preporuke za sprečavanje daljnjeg razvoja neformalnih naselja.

U projekat je bilo uključeno 13 stručnjaka za urbanističko planiranje iz NALAS članica iz Jugoistočne Evrope, a realizirala ga je Stalna konferencija gradova i općina Srbije u proteklih 11 mjeseci, uz podršku GIZ – Otvoreni regionalni fond za Jugoistočnu Evropu.

Konferencija je okupila stručnjake iz oblasti urbanističkog planiranja, predstavnike općina, asocijacija lokalnih samouprava i relevantnih ministarstava iz Jugoistočne Evrope, kao i međunarodnih organizacija.



Mreža asocijacija lokalnih vlasti predstavlja više od 4.000 lokalnih vlasti iz Jugoistočne Europe. Priznata je od strane RCC Strategije i Programa rada 2011-2013 kao najvažnije partnera u promicanju saradnje na ovom nivou. Sekretarijat RCC-a i NALAS-a radi na poboljšanju veze između lokalnih vlasti, tijela državne uprave i institucija EU.

Kao nasljednik Pakta o stabilnosti za Jugoistočnu Europu, Vijeće za regionalnu saradnju potiče saradnju u regiji te podržava evropske i evro-atlantske integracije u Jugoistočnoj Europi. Njegov rad se fokusira na ekonomski i socijalni razvoj, infrastrukturu i energiju, pravosuđe i unutrašnje poslove, sigurnosnu saradnju, izgradnju ljudskih potencijala, te parlamentarnu saradnju. Sjedište Vijeća za regionalnu saradnju je u Sarajevu i broji 46 članica – država, organizacija i međunarodnih finansijskih institucija.

INTERVJU: ADMIR HADŽIEMRIĆ, NAČELNIK OPĆINE TRAVNIK

Razgovarao: Adis Hamza BRDARIĆ



SARAJEVO, 25. oktobar/listopad (ONASA) – Načelnik Općine Travnik Admir Hadžiemrić u intervjuu za Agenciju ONASA govori, između ostalog, o prioritetima rada u narednom periodu, planiranoj realizaciji projekata, o potencijalima za investiranje u općinu Travnik, problematici zapošljavanja...

ONASA: Kakvo stanje ste zatekli u Općini Travnik po preuzimanju funkcije načelnika?

HADŽIEMRIĆ: Najvažnije je da su započeti kapitalni projekti koji su veoma značajni za općinu Travnik. U vremenu kada nije bio imenovan načelnik Općine, dosta posla se nakupilo i morali smo u mjesec dana uložiti dodatne napore kako bi probleme otklonili. Mogu reći da su me ljudi dobro prihvatili.

Inače, prije nego što sam preuzeo ovu funkciju bio sam jedan od članova Općinskog vijeća Travnik. Mnogo sam radio u nevladinom sektoru i sarađivao sa administracijom Općine, pa su me već ranije poznavali. Trudiću se da nastavim politiku i projekte koje je započeo moj prethodnik, a zbog toga sam, između

ostalog, i dobio podršku. Sa prethodnim načelnikom Općine Travnik su svi bili u dobrim odnosima. Ostavio je administraciju u solidnom stanju, a tu su i saradnici na koje se i ja mogu osloniti. Generalno mogu reći da sam zadovoljan stanjem.

ONASA: Na čemu će biti akcenat rada lokalne vlasti u Travniku u narednom periodu?

HADŽIEMRIĆ: Akcenat će biti na nastavku realizacije projekata koji su započetu još u mandatu mog prethodnika. Dakle, u narednih godinu dana pokušat ću implementirati već započete projekte.

Također, radit ćemo na prostornom planiranju u okviru poslovnih zona, kao i na privlačenju stranih investitora u realizaciju projekata koji se odnose na obnovljive izvore energije, a gdje je već odobrena jedna koncesija i radi se druga. Uporedo se održavaju javne rasprave vezane za projekat velikog sistema vjetroelektrana.

Inače, u Strategiji razvoja Općine Travnik zacrtani su ciljevi koji se odnose, između ostalog, na planiranje poslovne zone i na izgradnju komunalne infrastrukture.

ONASA: Koji su prioritetni projekti čija je realizacija planirana do kraja 2012. i za koje projekte je u budžetu predviđeno najviše sredstava?

HADŽIEMRIĆ: Težište je na dva kapitalna projekta. Prvi je okončanje izgradnje srednje škole i to sigurno neće biti okončano do 2012. godine. Inače, ovaj projekat se realizira uz sufinansiranje Vlade Federacije BiH. Drugi projekat je izgradnja sportske dvorane, koja bi trebala biti spremna za svjetsko rukometno juniorsko prvenstvo čije je održavanje planirano 2013. godine. I za ovaj projekat trebamo pomoć Vlade.

Istovremeno, prioritet nam je rješavanje problematike vodosnabdijevanja na prostoru platoa Vlašića, gdje su povratnička naselja u periodu suše ostala bez vode. Mogu reći da već radimo na rješavanju ovog problema. Također, radimo na razvoju Vlašića kao sportsko – rekreacionog zimskog i ljetnog centra, koji ima potencijale još za poljoprivredu i stočarstvo. Za ove projekte je planirano najviše sredstava.

ONASA: Ko su nosioci privrednog razvoja Općine Travnik?

HADŽIEMRIĆ: Kada govorimo o nosiocima privrednog razvoja Općine, Konfekcija "Borac" Travnik je neizostavna u tom smislu, iako trenutno ima dosta poteškoća u egzistiranju, pa joj je potrebna pomoć sa svih strana. Osim "Borca" koji zapošljava 1.700 radnika, tu su još, između ostalih, kompanije iz mesne i ostalih prehrambenih industrija koje svoje poslovanja baziraju na izvozu na tržišta Evrope, Bliskog Istoka i SAD-a. Istovremeno, imamo razvijenu mašinsku i drvnu, odnosno drvoprerađivačku industriju. Naravno, u općini Travnik je mnogo privrednika koji se bave turizmom, posebno planinskim.

ONASA: Koje grane privrede imaju najveće potencijale za ulaganje i šta Općina čini kako bi privukla ulagače?

HADŽIEMRIĆ: Općina intenzivno radi na prostornom planu u radno – poslovnoj zoni "Polje", te "Centralnom dijelu prigradskog naselja Dolac n/L". Radi se o zelenoj zoni u kojoj se mogu razvijati distributivni centri, "fina" industrija i sl.

Usvojili smo plan, još je ostalo rješavanje problema sa trasom brze ceste koju treba izmjestiti. To je zona u kojoj već imamo zainteresovane za investiranje, a pogotovo ukoliko se uzme u obzir strateški i geografski položaj Travnika koji je u centru Bosne i Hercegovine. Prolaskom brze ceste, mislim da će Travnik zaista imati još značajniju poziciju u BiH. Inače, zahvaljujući planini Vlašić i događajima koji se na njoj organizuju već sada je Travnik postao prepoznatljiv u cijeloj BiH.

ONASA: Koji su najčešći problemi sa kojima se suočava općina Travnik?

HADŽIEMRIĆ: Kao i u drugim općinama u BiH, tako se i općina Travnik suočava sa mnogim problemima vezanim za administraciju. Međutim, mi nastojimo da potencijalnim investitorima maksimalno iziđemo u susret tako što poštujemo sve rokove koji su potrebni za pokretanje poslovanja. Administracija Općine Travnik ostvaruje prihode zahvaljujući izdavanju ovakvih dozvola. Međutim, ja bih najviše volio kada bih mogao subvencionirati potencijalne investitore i osloboditi ih određenih plaćanja. Ipak, s obzirom na tešku situaciju u kojoj se nalaze sve općine, vrlo je teško na ovaj način izlaziti u susret, ali mi radimo ono što možemo i to je naš doprinos za podstrek investicija.

Problemi postoje i u komunalnoj djelatnosti, odnosno u organizaciji saobraćaja i parkiranja vozila u gradu, a tu je i mnogo problema sa nelegalnom gradnjom na Vlašiću. Također, problem je ruralni razvoj, odnosno razvoj infrastrukture u područjima koja nisu urbana. Moj cilj je da što više uradim na tom planu, kako bih ljudima omogućio da na svom ognjištu obezbjeđuju egzistenciju. Mislim da je izgradnja puteva, kvalitetno vodosnabdijevanje i organiziran otkup poljoprivrednih proizvoda, ono što je potrebno kako bi se ljudi iz ruralnih područja zadržali na svojoj zemlji.

ONASA: Da li ste zadovoljni nivoom zaposlenosti na području Općine Travnik i šta će općinska vlast uraditi na poboljšanju stope zaposlenosti, posebno mladih obrazovanih kadrova?

HADŽIEMRIĆ: Naveći broj nezaposlenih osoba su one koje su završile srednju školu. Ljude, pogotovo mlade, treba stimulirati da zasnivaju vlastite biznise, jer nema mjesta u administraciji.

Mislim da izgradnjom infrastrukture, privlačenjem investicija i podsticajima poljoprivrednoj proizvodnji možemo otvoriti prostor za nova zapošljavanja.

Travnik je najljepši grad na svijetu. On je grad muzej na otvorenom. Mišljenja sam da sa postojećim potencijalima ima velike šanse za napredak.

ODRŽANA RADIONICA U OKVIRU PRIPREME NASTAVKA PROJEKTA INTEGRIRANOG LOKALNOG RAZVOJA (ILDP)

SARAJEVO, 25. oktobar/listopad – Danas je, u prostorijama UNDP-a, održana radionica u okviru pripreme nastavka Projekta integriranog lokalno razvoja (ILDP). Skup je pozdravio g-din Joseph Guntern, direktor Švicarske agencije za razvoj i saradnju u Bosni i Hercegovini (SDC). G-đa Aida Laković-Hošo je skupu prezentirala rezultate predhodne faze ILDP-a, naglašavajući da su uspješno usvojene strategije u 23 jedinice lokalne samouprave i realizovano 23 projekata koji su proizašli iz strategija. Radionici su prisustvovali svi relevantni partneri svih nivoa vlasti i institucija kako bi se predstavio sadržaj projektnog dokumenta uključujući ciljeve, aktivnosti i očekivane rezultate naredne faze ILDP-a. Radionica je bila i prilika za sve učesnike da iznesu svoja mišljenja i preporuke u vezi sa nacrtom projektnog dokumenta. Pored jedinica lokalne samouprave iz predhodne faze, ukoliko projekat bude odobren bile bi uključene dodatne 24 partnerske jedinice lokalne samouprave.



Schweizerische Eidgenossenschaft
Confédération suisse
Confederazione Svizzera
Confederaziun svizra

Swiss Agency for Development
and Cooperation SDC



TRAVNIK I YALOVA OD DANAS ZVANIČNO PARTNERSKI GRADOVI



TRAVNIK, 24. oktobar/listopad – Svečanom ceremonijom potpisivanja Sporazuma o uspostavljanju partnerskih odnosa između Travnika i turskog grada Yalove, danas je ozvaničeno već ranije uspostavljeno prijateljstvo.

Ceremonija potpisivanja obavljena je u kabinetu Općine Travnik u prisustvu predstavnika zakonodavne i izvršne vlasti oba grada a svoje potpise na ovaj značajni dokument stavili su načelnik Općine Travnik, Admir Hadžiemrić i načelnik Yalove, Yakup Koçal.

U svojim izjavama načelnici su naglasili značaj uspostavljanja prijateljskih odnosa među gradovima za budući razvoj i zajedničke razvojne projekte.

U okviru protokolarnih aktivnosti za goste je upriličena i prezentacija Travnika u prelijepom ambijentu Starog grada a ovom prilikom svečano je otvoren i Turističko informativni centar Travnik. U narednom periodu dvije administracije će usaglasiti pravce saradnje i prioritetne oblasti.

OPĆINI KAKANJ DODIJELJEN CERTIFIKAT ISO 9001:2008



KAKANJ, 24. oktobar/listopad – Švicarska certifikacijska kuća SGS (Société Générale de Surveillance SA), sa sjedištem u Ženevi, dodijelila je Općini Kakanj certifikat ISO 9001:2008 za aktivnost "Realizacija lokalne uprave i samouprave". Certifikat važi za period 2. august/kolovoz 2011 - 26. juli/srpanj 2014. godine i ostaje na snazi pod uslovom zadovoljavajućih rezultata nadzornih audita.

Provjera uslova za izdavanje certifikata vršena je putem sarajevskog predstavništva SGS-a. Za načelnika Jašarspahića i administraciju kojom rukovodi dobijanje certifikata ISO 9001:2008 predstavlja veliku čast i zadovoljstvo, ali i obavezu da se nastavi putem kontinuiranog poboljšanja kvalitete pružanja usluga građanima općine Kakanj.

UVOĐENJE LEDIS-a U OPĆINI TEŠANJ

TEŠANJ, 21. oktobar/listopad –

Općina Tešanj je u veoma oštroj konkurenciji drugih općina u BiH, a zahvaljujući visokom indeksu poslovne konkurentnosti odabrana od strane Njemačkog društva za tehničku saradnju GIZ kao jedna od općina kojima je doniran informacijski sistem za lokalni ekonomski razvoj (LER) – LEDIS. Nakon održanog sastanka sa



Općinskim načelnikom Fuadom Šišićem, savjetnikom Općinskog načelnika za pristup EU-fondovima Doc.dr. Ismarom Alagićem i pomoćnikom Općinskog načelnika za privredu, finansije i inspeksijske poslove Hamzalijom Hojkurićem, predstavnici firmi DCG i VIHOR iz Srbije su održali obuku iz rada sa LEDIS softverom za uposlenike Općine Tešanj.

Prema riječima Doc.dr. Ismara Alagića, informacijski sistem LEDIS predstavlja softversko rješenje koje na jednom mjestu objedinjava sve vitalne funkcije neophodne za sinhronizovano upravljanje lokalnim ekonomskim razvojem. Uvođenjem navedenog informacionog sistema Općina Tešanj će kompletirati obim informacija koji zahtijevaju investitori i optimirati potrebno vrijeme reakcije na upite investitora.

OPĆINA VELIKA KLADUŠA NAJUSPJEŠNIJA U FBiH PO UPISU U REGISTAR POLJOPRIVREDNIH GAZDINSTVA



VELIKA KLADUŠA, 21. oktobar/listopad – Prema statističkom izvještaju Federalnog ministarstva poljoprivrede, vodoprivrede i šumarstva Općina Velika Kladuša je najuspješnija u Federaciji BiH po broju unijetih predmeta u Registar poljoprivrednih gazdinstva i Registar klijenata.

„Poljoprivredni registri za nas su jedan od značajnijih projekata s obzirom da njihovom uspostavom i vođenjem dobivamo kvalitetnu bazu podataka, koja će se

koristiti za još transparentnije vođenje poljoprivredne politike i trošenje poticajnih sredstava“, izjavio je općinski načelnik Admil Mulalić na današnjem sastanku sa uposlenicima Službe za poljoprivredu. Posebno me raduje podatak da smo najuspješnija Općina u vođenju RPG što pokazuje da smo uložili veliki rad i trud, te ovom prilikom zahvaljujem se svim saradnicima u ovoj Službi koji su doprinijeli ovakvom rezultatu, riječi su načelnika Mulalića.

Na sastanku kojem su prisustvovali i savjetnici općinskog načelnika, razgovaralo se i o planiranim aktivnostima za naredni period, kao što su davanje u zakup poljoprivrednog zemljišta u državnoj svojini na području Općine Velika Kladuša, uvođenje redovnog dana za poljoprivrednike, obavezi vršenja kontrole plodnosti tla, itd. Moramo napomenuti da na području Općine Velika Kladuša do sada ima 1200 registrovanih gazdinstva, a elektronski unos podataka u Registar poljoprivrednih gazdinstva i Registar klijenata na području naše Općine započeo je u februaru tekuće godine.

Zahtjeve za novčane poticaje i druge oblike podrške u poljoprivredi imaju pravo podnositi samo registrirani poljoprivredni proizvođači, odnosno gazdinstva i klijenti. Stoga, se pozivaju svi poljoprivrednici sa područja Općine Velika Kladuša, koji to nisu učinili, da se upišu u Registar poljoprivrednih gazdinstva i Registar klijenata čiji je cilj racionalnije, brže i kvalitetnije planiranje mjera nadležnih organa za pružanje podrške razvoju poljoprivrede i ruralnog razvoja.

IMENOVANA INTERRESORANA GRUPA ZA IZRADU PRIJEDLOGA ZAKONA O KONCESIJAMA



SARAJEVO, 21. oktobar/listopad – Vlada Federacije Bosne i Hercegovine je, na svojoj 22. sjednici od 20. oktobra/listopada, imenovala Interresornu radnu grupu za izradu **Prijedloga zakona o koncesijama**. Radnu grupu čine: Nihad Bajramović (predsjednik), Tarik Begić, Mirsad Hasanić, **Hamdo Ejubović (u ime Sveza općina i gradova FBiH)**, Amira Sinanović, Edvin Šarić, Dijana Bukovac i Irma Memić.

S obzirom na činjenicu da je, na osnovu traženja Saveza općina i gradova FBiH od 30.05.2011. dostavljen veoma mali broj primjedbi (dostavili: Tomislavgrad, Ključ, Bihać, Tuzla, Konjic, Kakanj, Olovo i Ilidža), Savez je, 21.10.2011. godine, uputio ponovnu molbu općinama da nam svoje primjedbe dostave **najdalje do 31.10.2011. godine**, kako bismo omogućili našem predstavniku da što bolje zastupa interese lokalnih zajednica u Interresornoj radnoj grupi.

ZAPOČELA IMPLEMENTACIJA SREDSTAVA DOBIJENIH EMISIJOM MUNICIPALNIH OBVEZNICA



TEŠANJ, 20. oktobar/listopad – Danas je Općinski načelnik Fuad Šišić sa Konzorcijem *Rial-šped d.o.o.* Doboj Istok i *AB trans d.o.o.* Tešanj potpisao ugovor za izgradnju infrastrukture u poslovnoj zoni *Glinište*, Jelah-Rosulje u Tešnju - I faza, kao i ugovor sa firmom *BG LAB d.o.o.* Brčko za vršenje stručno-tehničkog nadzora nad izgradnjom infrastrukturnih objekata poslovne

zone *Glinište* u Tešnju - I faza.

Ovim ugovorom će biti izgrađen dio saobraćajnice i infrastruktura u putnom pojasu (voda, kanalizacija, elektro i PTT vodovi), a bit će formirano i 18 placeva. Sredstva su obezbjeđena putem emisije municipalnih obveznica.

Nakon rješavanja imovinsko-pravnih odnosa, slijedi II faza kada će biti kompletno završena putna komunikacija. Očekujemo da će Glinište biti ključno mjesto razvoja i investicija na području općine Tešanj u narednim godinama, kazao je Općinski načelnik Fuad Šišić.

Rok za završetak radova je 90 dana.

OPĆINA TEŠANJ PROMOVIRA NAJBOLJE POSLOVNE IDEJE MLADIH



TEŠANJ, 20. oktobar/listopad – U četvrtak, 20. oktobra/listopada 2011. godine, u Kabinetu Načelnika Općine Tešanj, potpisana su četiri ugovora za *Najbolje poslovne ideje mladih*, koje su nakon provedene procedure javnog poziva ocijenjene

uspješnim. Ugovore su potpisali Općinski načelnik Fuad Šišić i mladi sa najuspješnijim poslovnim planovima - Dženita Mujkanović, Safet Turkeš, Armin Mehičić i Mersad Korajlić. Potpisivanju Ugovora je prisustvovao i predsjednik Komisije koja je ocjenjivala Biznis planove Smajl Ramović, inače direktor firme MHBA, kao i predstavnici Općine Tešanj koji su radili na obradi rezultata i pripremi ugovora Hamzalija Hojkurić i Mirnes Dedukić.

Ovo je prva godina da Općina Tešanj na ovakav način stimulise mlade ljude, što je dobar primjer i poticaj ostalim mladim ljudima da uzmu učešće naredne godine. Mi ćemo, kako je i Ugovorom predviđeno platiti registraciju djelatnosti, zakup prostora i dio obaveza na platu, što zajedno iznosi 32.800 KM, kazao je Općinski načelnik Fuad Šišić.

Na raspisani javni poziv ukupno je pristiglo 12 biznis planova: devet je kvalifikovanih, četiri je bilo zainteresovanih za potpis, a osam stimulisano za učešće.

Očekivani efekti su četiri nove registrovane djelatnosti (dva preduzeća i dva obrta), pet novih uposlenih u prvoj godini - 35 u prve tri godine. Ukupan nivo investicija koji će kroz ova četiri projekta biti realiziran je 353.000,00 KM.

OPĆINA BIHAĆ, USAID I SIDA NASTAVLJAJU USPJEŠNU SARADNJU



BIHAĆ, 20. oktobar/listopad – Sudeći po današnjem sastanku koji je upriličen u Bihaću, Općina Bihać, USAID i SIDA imaju bezbroj primjera dobre prakse i suradnje, na čemu se mogu graditi novi zajednički projekti. Naime, općinski načelnik Albin Muslić primio je danas tim konsultanata Američke agencije za međunarodni razvoj - USAID i Švedske razvojne agencije - SIDA,

s kojima je razgovarao, kako o dosadašnjim zajedničkim projektima koji su uspješno realizirani, tako i o drugim temama u kojima dokazani prijatelji Bihaća žele pružili svakovrsnu pomoć. Tokom susreta Muslić se zahvalio na sveukupnoj, dosadašnjoj pomoći ovih agencija, ali i američke i švedske administracije koje su učinile mnogo podržavajući reforme u BiH. Ovom prigodom, Wade Channell i Mike Keshishian iz Washingtona, te Bo Synnerholm, stručnjak za politička pitanja iz SIDA-e, koji čine tim konsultanata, posebno su se interesovali za dosadašnji lokalni ekonomski razvoj, te sami tok reforme javne uprave.

S obzirom da se posredstvom nekoliko projekata, od GAP-a do FIRME i FARME, već duži niz godina odvija direktna finansijska, tehničko-tehnološka i stručna pomoć Općini Bihać i drugim jedinicama lokalne samouprave u BiH, predstavnike USAID-a i SIDA-e je posebno interesovalo stanje u privredi, kao i prepreke koje je moguće otkloniti kako bi se unaprijedio ekonomski razvoj. Tokom razgovora o ovoj temi, načelnik Muslić je predočio svojim gostima više informacija o sadašnjim i nekadašnjim ekonomskim potencijalima, ali i opravdanim i nužnim promjenama ili dogradnje određenih zakona koji su kočnica snažnijeg ekonomskog razvoja i zapošljavanja. Ovdje je posebno istaknuta potreba zakonskog uređenja javno-

privatnog partnerstva, funkcioniranja poduzetničkih zona, cijena koštanja zemljišta za gradnju proizvodnih pogona, te pomoći u razvoju malog i srednjeg poduzetništva i obrta. Kako je kazano, značajne i pozitivne pomake treba napraviti i u sektoru turizma i smještajnih kapaciteta, razvoja NP „Una“, proizvodnji zdrave hrane i zaštiti domaće proizvodnje.

Veći dio promišljanja i pažnje, zaključeno je, treba u najskorijem vremenu usmjeriti prema legislativi u BiH, bez obzira što se postepeno vide pozitivni pomaci, ali i boljem funkcioniranju same strukture države BiH, bez čega je nemoguće značajnije utjecati na ekonomske tokove u lokalnim sredinama. Na kraju današnjeg susreta načelnik Muslić je Channellu, Keshishianu i Synnerholmu predstavio i nekoliko projektnih ideja za koje smatra da mogu biti dio buduće uspješne suradnje, kako u pogledu infrastrukturnog razvoja Bihaca, tako i kao primjer za druge jedinice lokalne samouprave.

NAČELNIK E. HAJDER JEDINI NAČELNIK IZ BIH KOJI JE PRISUSTVOVAO KONFERENCIJI O ENERGETICI U BEOGRADU

BOSANSKI PETROVAC, 20.

oktobar/listopad – Konferencija pod nazivom "Energija, razvoj, demokracija: stvaranje nove energetske budućnosti za jugoistočnu Evropu" održala se u Beogradu 17. i 18. oktobra/listopada. Konferencija je okupila predstavnike parlamenata, institucija izvršne vlasti, nevladinih organizacija, eksperata ali i brojne predstavnike međunarodnih organizacija i akademskih institucija koje se bave ovom tematikom. Pored predstavnika BH parlamenta i nadležnih entitetskih ministarstava učešće na dvodnevnoj konferenciji o energetske budućnosti u jugoistočnoj Evropi u Beogradu uzeo je i načelnik Općine Bosanski Petrovac, Ermin Hajder. Delegaciju iz BiH činili su i zamjenik predsjedavajućeg Komisije za saobraćaj i komunikacije Predstavničkog doma Parlamenta BiH Mirza Kušljagić i član Komisije Mirsad Mešić, zamjenik predsjedavajućeg Komisije za spoljnu i trgovinsku politiku, carine, saobraćaj i komunikacije Doma naroda Staša Košarac, te federalni ministar energetike Erdal Trhulj, savjetnik ministra energetike Vlade RS i predsjedavajući Skupštine RS Igor Radojčić.



Skup je održan pod visokim pokroviteljstvom predsjednika Republike Srbije Borisa Tadića, koji je u uvodnom obraćanju naglasio značaj zajedničke energetske politike na regionalnom nivou. On je takođe podvukao da pojačana saradnja u ovoj oblasti može umanjiti ovisnost nacionalnih ekonomija o uvozu energenata, što u konačnici doprinosi ekonomskoj, socijalnoj ali i političkoj stabilnosti.

Tokom dva dana konferencije predviđena su brojna izlaganja o pitanjima kao što su regionalna saradnja, pristupanje energetskom tržištu EU, zakonodavna i nadzorna uloga parlamenata u postizanju EU - 2020 ciljeva, jačanje tržišnih potencijala za ulaganje u održivo korištenje energije, energetske i klimatske promjene, te ukupni odnosi EU i regiona u oblasti energetike.

"Indikativno je da sam jedini načelnik iz BiH koji je bio pozvan i prisustvovao ovoj konferenciji na kojoj je bilo učesnika iz preko 10 zemalja iz regiona. Ovo svakako daje jedan veliki doprinos naporima Bosanskog Petrovca da postane bitna i osvještana lokalna zajednica i kao takva primjer u našoj zemlji kad je u pitanju

iskorištavanje resursa obnovljivih izvora energije. Kako je sljedeća konferencija zakazana u Zagrebu naredne godine, a sa temom uloga lokalnih zajednica u razvoju energetske potencijala i energetske efikasnosti, ovo je jako dobra prilika da u narednoj godini napravimo bitne korake u tom sektoru i to prezentiramo.”, istakao je načelnik Hajder po povratku iz Beograda.

Načelnik Hajder je iskoristio svoj boravak u glavnom gradu Srbije da bi se sastao i sa predstavnicima Udruženja petrovčana u Beogradu.

U MAGLAJU BORAVILA DELEGACIJA OPĆINE TOVARNIK (RH)



MAGLAJ, 20. oktobar/listopad – U Općini Maglaj, prije dva dana boravila je delegacija Općine Tovarnik, iz Republike Hrvatske, na čelu sa Općinskim načelnikom Jakobom Asićem. Tokom susreta sa Općinskim načelnikom Mehmedom Mustabašićem i njegovim saradnicima razmjenjena su iskustva i projekti koje bi ove dvije općine mogle kandidovati prema IPA fondovima.

Nakon sastanka, načelnik Općine Tovarnik je izjavio: “Tovarnik je mala općina koju nije mimoišao nesretni rat. Imamo dobre potencijale vjetar, vodu, sve uslove za proizvodnju zdrave hrane koja je danas u svijetu sve skuplja. Stupili smo u kontakt sa predstavnicima Općine Maglaj i nadam se da ćemo naći zajednički interes na planu prekogranične saradnje Hrvatske i BiH preko lokalnih jedinica. Moramo koristiti ta europska sredstva koja nam se nude, moramo ih znati uzeti, a to ćemo znati ako imamo kvalitetne projekte.

Komunikaciju nije teško uspostaviti ako se to zaista želi. Meni nikada problem nije bio koje smo vjere, nacionalnosti i to, a vidim da to ni ovdje nije problem, ako se ljudi povežu oni imaju i zajedničke interese. Trebamo se povezivati bez obzira gdje bili i ma ko bili.”

Načelnik Mustabašić je izrazio zadovoljstvo na posjeti Općine Tovarnik koja iza sebe ima veliko iskustvo na pripremi i realizaciji značajnih projekata, te istakao prioritete Općine Maglaj. “Prioritet za Općinu Maglaj je projekat toplifikacije grada Maglaja i to je prvi projekat koji ćemo pokušati zajednički kandidovati prema europskim fondovima, ne zanemarujući ni razvoj turizma, poljoprivrede, izgradnje brana itd.”

Pored načelnika Asića i njegovih saradnika, Maglaj je posjetio i voditelj Ureda za međunarodnu saradnju Tomislav Planenić koji je prepoznao mogućnosti za zajedničko partnerstvo, te iznio određene prijedloge koji su interesantni za Maglaj.

Ovo je bio inicijalni sastanak te se partneri nadaju da će do 05. decembra/prosinca uspjeti aplicirati sa zajedničkim projektom, a time potaknuti i buduću saradnju.

ODRŽANA TREĆA RADIONICA LEAP



KUPRES, 19. oktobar/listopad – Dana 19.10.2011. godine, u prostorijama Općine Kupres, održana je treća radionica u okviru projekta izrade Lokalnog ekološkog akcionog plana (LEAP) općine, u okviru projekta MDG-F program očuvanje okoliša i klimatske promjene: "Standardizacija upravljanja okolišem, povezivanje lokalnih i državnih aktivnosti u Bosni i Hercegovini", kojeg provodi Razvojni program Ujedinjenih naroda (UNDP). Cilj je, određivanje mjera i aktivnosti za postizanje ciljeva, kada je u pitanju stanje okoliša, te postavljanje ciljeva i diskusija o prioritetima aktivnosti za postizanje istih.

Na radionicu su pozvani svi zainteresirani sa područja općine i županije (građani, gospodarstvenici, predstavnici svih udruga i nevladinih organizacija), a istoj su bili prisutni: predstavnici UNDP-a i MDG-F i članovi radne grupe za provedbu projekta sa predsjednikom Mirom Pašalić i koordinatorom Dariom Čičak, kao i predstavnici parlamentarnih političkih stranaka koje djeluju u općinskom vijeću, predstavnici mjesnih zajednica, i načelnik općine Stjepan Herceg.

Uvodno izlaganje i riječi dobrodošlice iznio je koordinator Dario Čičak, a zatim svaki član radnog tima po svojoj oblasti prezentirao je sve što je do sada učinjeno i što još treba uraditi. Nakon toga otvorena je diskusija u kojoj su aktivno sudjelovali većina učesnika ove radionice. Na kraju donesen je zaključak da se nastavi sa radom sve do potpunog završetka cjelokupnog projekta.

MDG-F program Očuvanje okoliša i klimatske promjene: "Standardizacija upravljanja okolišem, povezivanje lokalnih i državnih aktivnosti u BiH" je petogodišnji program koji zajednički provodi pet UN agencija: UNDP, UNV, UNEP, FAO i UNESCO u partnerstvu sa Ministarstvom za vanjsku trgovinu i ekonomske odnose BiH, Ministarstvom za prostorno uređenje, građevinarstvo i ekologiju RS, Ministarstvom poljoprivrede, vodoprivrede i šumarstva FBiH, općinama, te organizacijama civilnog društva. Program se financira sredstvima španjolskog Fonda za dostizanje milenijskih razvojnih ciljeva (MDG-F).

FOND ZA ZAŠTITU OKOLIŠA FEDERACIJE BIH OPĆINI GORAŽDE INTERVENTNO UPUTIO 100.000 KM

GORAŽDE, 19. oktobar/listopad – Načelnik Općine Goražde Muhamed Ramović i direktor Fonda za zaštitu okoliša Federacije BiH Safet Harbinja danas su potpisali ugovor kojim je Fond za zaštitu okoliša interventno uputio Općini Goražde 100.000 KM.

Ova sredstva će biti upotrijebljena za sanaciju indirektnih šteta od poplava, a riječ o oštećenjima obaloutvrde te sanaciji korita rijeke Drine.

"U tom cilju mi smo izvršili pripreme u okviru Fonda i dodjelili prva sredstva u ovom momentu kako bi se aktivnosti nastavile realizovati, te da pomognemo koliko možemo da zaustavimo dalje procese degradacije obaloutvrde i korita Drine", rekao je Harbinja.

"Pozitivno smo iznenađeni ovom donacijom. Sredstva su značajna jer su štete, one indirektno od poplava velike. Mi se suočavamo sa svakodnevnim oštećenjima obaloutvrde, problemi su u sekundarnoj mreži i dr. Mi smo inače prema Fondu za zaštitu okoliša Federacije BiH aplicirali sa dva projekta ukupne vrijednosti 200.000 KM, a očekujemo da neće izostati podrška", izjavio je načelnik Ramović. Sredstva će biti utrošena u skladu sa postojećim planovima i potrebama, a u nastavku aktivnosti koje se provode zahvaljujući sličnim donacijama, na zaštiti i sanaciji korita rijeke.

Agencija za slivove rijeke Save već je interventno djelovala sa 80.000 KM, a prema riječima načelnika Ramovića očekuje se i pomoć od još 60.000 KM. Inače, susret sa direktorom Fonda bio je prilika i za razgovore o drugim temama, kao što je npr. problematika odlaganja otpada.



U tom kontekstu je Harbinja ovom prilikom istakao da se kroz proces reciklaže pokušava naći adekvatna ekonomsku računicu kako građani ne bi osjetili povećanje cijena za odlaganje komunalnog otpada.

Pred Općinom Goražde je rješavanje brojnih pitanja, poput 56 divljih deponija smeća koje trenutno predstavljaju veliki problem.

POČEO UPIS MUNICIPALNIH OBVEZNICA OPĆINE CAZIN



CAZIN, 18. oktobar/listopad – Jučer je počeo upis obveznica Općine Cazin koji će trajati do 26. oktobra/listopada. Upis se može izvršiti kod svih brokerskih kuća koje su ovlaštene za posredovanje na Sarajevskoj berzi vrijednosnih papira. Ulagači u općinske obveznice ostvarit će zagarantirane godišnje isplate prinosa u iznosi od 6% godišnje, te u tom smislu Općina Cazin želi

informisati sve građane i privredna društva Općine Cazin o upisu obveznica koji na taj način mogu ostvariti dodatnu finansijsku korist, ali i na taj način doprinjeti ekonomskom razvoju općine Cazin kroz Projekat uspostavljanja privredne zone „Ratkovac“ koji se finansira iz sredstava prikupljenih upisom obveznica. Minimalna cijena upisa iznosi 100 KM po obveznici, a u ponudi je 10.000 obveznica. Rok dospjeća općinskih obveznica je 12 godina uz grace period od 7 godina. Sve dodatne informacije mogu se dobiti pozivom na broj telefona 037/514-006 ili

putem emaila na adresu op.cazin@bih.net.ba.

Javni poziv i prospekt emisije može se besplatno u općinskom organu uprave i dostupan je na: web stranici Općine Cazin www.opcinacazin.ba, web stranici agenta emisije "SEE Investment Solutions" www.seeinvestments.ba web stranici Sarajevske berze www.sase.ba

Općina Cazin ovom emisijom obveznica namjerava prikupiti sredstva u iznosu od 1.000.000 koja će biti korištena za rješavanje imovinsko-pravnih pitanja i uređenje infrastrukture poslovne zone "Ratkovac" u Ćoralićima.

"Na taj način će se osigurati uslovi za investiranje i gradnju novih proizvodnih kapaciteta na ovom području što će omogućiti dalji razvoj zajednice, otvaranje novih radnih mjesta i posredno povećanje prihoda općinskog budžeta kroz komunalne takse, rente i porezne prihode", ističe se u prospektu ove emisije.

Osim ove investicije općina Cazin već realizira nekoliko drugih čija se ukupna vrijednost kreće oko 4,5 miliona KM. Tako su aktivnosti na uređenju centralnog gradskog trga, u što će biti uloženo oko 1.9 miliona KM, već započele, a radi se i na izgradnji decentraliziranog kanalizacionog sistema u jednoj od mjesnih zajednica u što će biti uloženo oko 800.000 KM. Za izradu studije izvodljivosti i glavnog projekta glavnog kanalizacionog sistema Općina je osigurala sredstva od oko 1.5 miliona KM, a za izgradnju prve faze glavnog kanalizacionog kolektora 350.000 KM.

OKRUGLI STO - ZAVRŠNA RASPRAVA O RADNOM MATERIJALU PRIJEDLOGA ZAKONA O LOKALNOJ SAMOUPRAVI KANTONA SARAJEVO



SARAJEVO, 18. oktobar/listopad – Ministarstvo pravde i uprave Kantona Sarajevo u saradnji sa OSCE Misijom u Bosni i Hercegovini je dana 18.10.2011. godine organiziralo Okrugli sto radi završne rasprave o Radnom materijalu prijedloga Zakona o lokalnoj samoupravi Kantona Sarajevo. Okruglom stolu su, pored organizatora, prisustvovali predstavnici: Općine Stari Grad Sarajevo, Općine Trnovo, Općine Hadžići, Općine Novi Grad Sarajevo, Općine Ilijaš, Općine Vogošća, Općine Novo Sarajevo, Općine Ilidža, Općine Centar Sarajevo, Grada Sarajeva, Saveza općina i gradova Federacije Bosne i Hercegovine, Ministarstva privrede Kantona Sarajevo, Ministarstva prostornog uređenja i zaštite okoliša Kantona

Sarajevo, Ministarstva kulture i sporta Kantona Sarajevo, Ministarstva za rad, socijalnu politiku, raseljena lica i izbjeglice Kantona Sarajevo, Ministarstva obrazovanja i nauke Kantona Sarajevo, Ministarstva stambene politike Kantona Sarajevo, Ministarstva finansija Kantona Sarajevo, te Kantonalne uprave za inspekcijske poslove.

Učesnici su bili podijeljeni u tri radne grupe po oblastima kako slijedi: I radna grupa – planiranje i uređenje prostora i zaštita okoliša, II radna grupa – komunalni poslovi i stambena politika i III radna grupa – obrazovanje, kultura i sport. Diskutovalo se o ponuđenim rješenjima koja se odnose na razgraničenja nadležnosti između Kantona i jedinica lokalne samouprave na području Kantona. Skupština Kantona Sarajevo utvrdila je ranije nacrt ovog Zakona, a široka javna rasprava koja je trajala tri mjeseca naznačila je mnoga pitanja i dileme na koje ovaj Zakon treba dati odgovore.

Okrugli sto je pružio dodatnu mogućnost za dijalog između različitih nivoa vlasti i diskusiju o raspodjeli nadležnosti prije izrade konačne verzije prijedloga Zakona i njegovog upućivanja u dalju skupštinsku proceduru. Rasprava na Okruglom stolu je pokazala da su i, pored iskazanih napora i dostignutog stepena usaglašenosti, još mnoga pitanja ostala sporna. Iz tih razloga mišljenje je većine učesnika u diskusiji da se o Zakonu mora i treba još razgovarati, te da je bez obzira što se kasni u njegovom donošenju tj. usaglašavanju sa Zakonom o principima lokalne samouprave FBiH, potrebno još tražiti odgovarajuća rješenja jer specifičnost organizacije Sarajeva, kao Kantona, Grada i gradskih i vangradskih općina, to na neki način i zahtijeva.

ZBOG NEPOVOLJNE HIDROLOŠKE SITUACIJE MANJA NAKNADA ZA BUŠKO JEZERO



TOMISLAVGRAD, 17. oktobar/listopad – Iznos naknade koju "Hrvatska Elektroprivreda" (HEP) plaća općinama Tomislavgrad i Livno za korištenje vode iz Buškog jezera za proizvodnju električne energije u Hidroelektrani (HE) "Orlovac" biće umanjen ove godine, zbog nepovoljne hidrološke situacije, rekao je načelnik

općine Tomislavgrad Ivan Vukadin.

Naknada koju ove općine dobijaju od HEP-a zavisi od hidrološke situacije tokom kalendarske godine, odnosno količine proizvedenih kilovata struje. U većem dijelu ove godine hidrološka situacija bila je nepovoljna, što za posljedicu ima manju proizvedenu količinu električne energije u HE "Orlovac", rekao je Vukadin.

"Prošla godina je bila veoma dobra i općina Tomislavgrad od HEP-a je dobila oko 3,8 miliona maraka ili dva puta više nego u ranijim godinama. Ova godina hidrološki je nepovoljna, što će značajno umanjiti iznos naknade", rekao je Vukadin lokalnom radiju u Livnu.

Prema njegovim riječima, izmjenama i dopunama Zakona o izdvajanju i usmjeravanju dijela prihoda preduzeća ostvarenog korištenjem akumulacionih objekata u FBiH iz 2009. godine, naknada koju općinama Tomislavgrad i Livno plaća HEP povećana je sa 0,005 na 0,010 maraka po proizvedenom kilovat-satu električne energije.

Izmjenama i dopunama ovog zakona kao dodatni kriterijumi po kojima općinama Tomislavgrad i Livno, na čijoj se teritoriji nalazi najveće vještačko jezero u Evropi površine oko 55 kilometara kvadratnih, pripada i naknada za potopljeno zemljište, kao i naknada za količinu vode koja puni jezero sa područja dviju ili više općina.

Ove općine nisu mogle da se dogovore sa čijeg se područja prikuplja više vode u Buško jezero i kojoj općini po tom osnovu treba da pripada veća naknada, pa je situaciju koja je dovela do višemjesečne obustave plaćanja naknade koja predstavlja značajan prihod općinskih budžeta "presjekao" HEP i odredio da se naknada između Tomislavgrada i Livna dijeli u omjeru 57,705 odsto prema 41,285 posto.

POTPISAN SPORAZUM O SUFINANSIRANJU INDUSTRIJSKIH ZONA U HADŽIĆIMA, ILIDŽI, ILIJAŠU I VOGOŠĆI



SARAJEVO, 17. oktobar/listopad

– Ministar privrede Kantona Sarajevo (KS) Rusmir Sendić i načelnici općina Hadžići, Ilidža, Ilijaš i Vogošća, Hamdo Ejubović, Senaid Memić, Nusret Mašić i Edin Smajić, potpisali su danas u Sarajevu Sporazum o sufinansiranju industrijskih zona na područjima ovih općina.

Vlada KS usvojila je Program raspodjele finansijskih sredstava za sufinansiranje industrijskih

zona po općinama u ukupnom iznosu od 960.000 KM, od čega je za Općinu Hadžići namijenjeno 150.000 KM, Općinu Ilidža 260.000 KM, Općinu Ilijaš 300.000 KM i Općinu Vogošća 250.000 KM.

Ministar Sendić je ovom prilikom izrazio zadovoljstvo što je, nakon dvije godine pauze, sufinansiranje industrijskih zona od strane Kantona, ponovo zaživjelo.

Sredstva koja su namijenjena za područje Općine Ilidža bit će utrošena za sufinansiranje industrijske zone "Famos" Hrasnica, odnosno rekonstrukciju postojećih i izgradnju novih instalacija, dok se u Općini Hadžići planira sufinansiranje završetka saobraćajnice i izgradnja mosta u industrijskoj zoni Mrđanović polje, a u Općini Ilijaš sredstva su namijenjena za sufinansiranje industrijske zone Luke Ilijaš, i to za finansiranje projekta rješavanja imovinsko – pravnih odnosa, te u Općini Vogošća za finansiranje dvije trafostanice i sufinansiranje rasvjete u novoj industrijskoj zoni.

Ministar Sendić je pojasnio da su od ukupnih planiranih sredstava, 460.000 KM sredstva iz direktnog priliva u Budžet KS, dok su 500.000 KM kreditna sredstva KS, koja će biti operativna nakon što ih poslanici Skupštine KS usvoje u četvrtak, 20. oktobra/listopada 2011. godine.

Potpisivanju Sporazuma prisustvovao je i premijer KS Fikret Musić, koji je istakao

da je ovo izuzetno značajan projekt, odnosno iskorak za ulaganja i realizaciju kapitalnih projekata u narednoj godini, od kojih će obostrani interes imati i lokalne zajednice i Kanton.

Načelnici su Sporazum ocijenili kao značajan potez kantonalnih vlasti kojim se vraća kontinuitet ulaganja u industrijske zone što su i najopravdanija ulaganja koja potiču zapošljavanje.

Izrazili su očekivanja u nastavak aktivnosti sufinansiranja kako bi se uređenje industrijskih zona potpuno završilo.

POTICAJ RAZVOJA PODUZETNIŠTVA KROZ SMANJENJE CIJENE ZEMLJIŠTA

TOMISLAVGRAD, 14. oktobar/listopad – Prošlogodišnje usvajanje Odluke o izmjenama i dopunama Odluke o utvrđivanju iznosa naknade za dodijeljeno gradsko i ostalo zemljište na Općinskom vijeću Tomislavgrad, kojom je za proizvodne pogone na području općine smanjena cijena zemljišta na 1 KM/m², pokazalo se kao odličan potez općinske vlasti.

Tako je do sada izgrađeno, ili se gradi, nekoliko proizvodnih pogona. Najviše na industrijskoj zoni Vučilov brig, a u tijeku je izgradnja i pogona za proizvodnju peleta u Mokronogama, saopćeno je iz općine.

Dakle, temeljem ove Odluke potpisani su ugovori s nekoliko poduzeća, kojima se investitorima dodjeljuje zemljište po minimalnoj cijeni (1 KM/m²), a isti su obvezni zaposliti određeni broj djelatnika, u određenom vremenskom razdoblju.

Iz Općine Tomislavgrad navode da su investitorima, posebice, zanimljive parcele na industrijskoj zoni, gdje je urađena i dovedena kompletna komunalna infrastruktura, no ima interesa i na ostalim dijelovima općine.

Smanjenjem cijene zemljišta općina Tomislavgrad želi privući investitore i ovime ih potaknuti na razvoj proizvodnih pogona i time na smanjenje nezaposlenosti.



ISKUSTVA OPĆINE TEŠANJ: ZAKONI SPREČAVAJU ULAGANJE



(e-Kapija) U Općini Tešanj, prvoj u Federaciji BiH koja je izdala municipalne obveznice, zadovoljni su prvom emisijom obveznica.

"Možemo biti zadovoljni samim procesom emisije obveznica, interes investitora je postojao tako da je za sedam dana prodana naša prva emisija obveznica, što je najbolji i najlakši dio procesa s obzirom na

to da efekte od sredstava koja su došla na naš račun još nemamo", kaže općinski načelnik Fuad Šišić.

Prema njegovim riječima, Općina ima negativna iskustva sa Zakonom o javnim nabavkama jer su zbog tog zakona imali dva pomjeranja rokova za izradu projektne dokumentacije i uvođenje izvođača radova u posao koji je već trebao početi raditi na uređenju poslovne zone Glinište za koju su i namijenjena sredstva prikupljena emisijom obveznica, ali zbog žalbi u postupku i zakonskog okvira koji omogućava svakome da uspori proces, Općina ni do danas nije uvela u posao izvođača radova. Drugo negativno iskustvo jeste Zakon o građevinskom zemljištu koji onemogućava lokalnim zajednicama da ukoliko se ne dogovore sa vlasnikom parcele o visini naknade, bez obzira na to što će sud donijeti krajnju presudu, nije moguće preuzeti zemljište dok sud ne presudi, a to je dug proces.

Radna mjesta

"Prvu emisiju smo i plasirali na niskom nivou zbog opreza jer nismo znali s čim ćemo se sresti na tom putu, ono što očekujemo jeste da u naredna dva mjeseca imamo izgrađenu infrastrukturu i da na proljeće imamo 18 spremnih placeva da ponudimo investitorima i to je ono što je najvažnije. Ponudićemo im zemljište bez ikakve naknade i komunalnih taksi, a od njih očekujemo nova radna mjesta i da ispoštuju ono što sa Općinom bude potpisano kao ugovor", kazao je Šišić.

U posljednjih nekoliko mjeseci bilo je određenih razgovora sa investitorima iz Italije, Slovenije i Turske, tako da postoji interes stranih investitora, ali je razgovarano i sa lokalnim privrednicima koji imaju svoje partnere s kojim razgovaraju i koji su sami zainteresovani za poslovnu zonu, tako da načelnik vjeruje kako će zona vrlo brzo biti popunjena.

Pet miliona KM

„Već smo trebali ići sa drugom emisijom da nije bilo ove dvije kočnice da uredimo ostatak poslovne zone Glinište, gdje slijedi veliki posao. Većim dijelom je to privatno zemljište koje valja preuzeti i sporazumjeti se oko naknade i taj proces teče, ali naše iskustvo pokazuje da ljudi, pošto očekuju da će vrijednost zemljišta porasti, nisu spremni za razumnu tržišnu cijenu to prodati.

Prema procjeni naše komisije, cijena je 2KM/m², očekuje se po razvijanju infrastrukture da će biti 20 KM, tako da ljudi sada kalkulišu i to nas vodi u sudske procese. Zbog toga ćemo odgoditi drugu emisiju dok ne riješimo sudske procese, kada već krenemo u emisiju da ta sredstva možemo brzo utrošiti jer nije racionalno da stoje", rekao je Šišić.

Druga emisija obveznica Općine Tešanj biće oko pet miliona KM. S obzirom na to da budžet Općine nije ni pod kakvim opterećenjem, osim emisije od 500.000 KM, što je opterećenje dva posto, Općina može ići do 10 posto opterećenja budžeta. Općine, ustvari, dobijaju sredstva od viših nivoa vlasti za uređenje poslovnih zona, ali da ne bi čekali nekoliko godina na ta sredstva, u Općini Tešanj su odlučili odmah pribaviti novac i urediti poslovnu zonu, a plaćati kasnije.

POZIV ZA DOSTAVU PONUDA ZA IZRADU PROGRAMA OBUKE ZA IZABRANE ZVANIČNIKE U JLS

SARAJEVO, 20. oktobar/listopad – U svrhu podrške provođenju ciljeva „Strategije obuke za zaposlene u JLS“, gdje je jedan od ciljeva usmjeren na pripremu prioriternih programa obuke za izabrane zvaničnike, predviđena je izrada

integriranog programa obuke za novoizabrane lokalne zvaničnike. Ovaj program obuke se priprema u saradnji sa Savezom općina i gradova FBiH, a u sklopu Projekta „MTS - Sistem obuke za JLS“, koji je zajednička inicijativa Razvojnog programa Ujedinjenih nacija (UNDP) i Švedske agencije za međunarodni razvoj i saradnju (SIDA).

Integrirani program obuke treba poslužiti kao uvodni i orijentacioni program obuke koju sistem obuke nudi novoizabranim načelnicima, općinskim vijećnicima nakon lokalnih izbora 2012. godine. U okviru pripreme integriranog programa, objavljuju se ponude za izradu specifičnih programa: „Lokalne vlasti od A do Ž“ i „Lokalni lideri“.

Poziv je otvoren od 18. oktobra/ listopada do 3. novembra/studenog 2011. godine do 10:00 sati.

Zainteresovani ponuđači više informacija mogu dobiti na web stranici UNDP-a, odnosno na sljedećim linkovima:

<http://www.undp.ba/index.aspx?PID=19&RID=1233>

<http://www.undp.ba/index.aspx?PID=19&RID=1234>



RASPISAN JAVNI POZIV ZA PROGRAM TRANSNACIONALNE SURADNJE SEE



Svi koji imaju projekte kojima je obuhvaćeno područje Jugoistočne Europe (SEE) mogu sa njima aplicirati na četvrti [javni](#) poziv za podnošenje projektnih prijedloga u okviru IPA Programa transnacionalne suradnje Jugoistočna Europa (SEE) koji je objavljen prije nekoliko dana.

Sredstva iz ovog programa dostupna su i za projektne partnere iz BiH te drugih tzv. IPA zemlja kao što su Albanija, Crna Gora, Hrvatska, Makedonija i Srbija. Dostupna sredstva za ove zemlje iznose 10,3 milijuna eura.

Ovaj projekt transnacionalne suradnje fokusira se na oblasti koje su utvrđene Lisabonskom i Gothenburškom agendom, a među prvim je povećanje inovacija u poduzetništvu te stvaranje ekonomije znanja kao i jačanje ekonomskih veza među zemljama ovog područja.

Osim tog područja fokus je i na projektima zaštite okoliša i održivom rastu ovih područja.

U programu, inače, sudjeluje 16 zemalja (zemlje članice EU, zemlje kandidati i potencijalni kandidati, i treće zemlje). Partnerstvo čine partneri iz najmanje tri zemlje sudionice u programu, s tim što najmanje jedan partner mora biti iz zemlje

članice Europske unije.

Poziv je, kako je navedeno, otvoren za sve prioritete i mjere SEE programa i to do 25. novembra/studenog ove godine, do kada vodeći aplikanti koji dolaze iz zemalja članica EU mogu podnijeti projektnu aplikaciju.

Jedna od novina u okviru ovog programa je da će se njegova implementacija odvijati u novom sustavu upravljanja, tzv. shared management, što znači da ne postoji posebna alokacija IPA sredstava za svaku zemlju pojedinačno (što je bio slučaj u prva dva poziva), te će se projektni partneri iz IPA zemalja financirati iz zajedničkog fonda IPA-e.



NAJAVA obilježavanja Dana općina za mjesec novembar/studeni

- **17. novembar/studeni - Dan Općine Čelić.** Na taj datum 1991. godine putem referenduma 99% stanovništva se izjasnilo za izdvajanje iz sastava opštine Lopare i SAO Semberija i Majevica.
- **18. novembar/studeni - Dan Općine Grude.** Na ovaj datum 1991. godine osnovana je Hrvatska zajednica Herceg-Bosna, kao politička, kulturna, ekonomska i teritorijalna organizacija hrvatskog naroda u BiH.
- **21. novembar/studeni - Dan Općine Drvar.** Ovaj datum je prihvaćen za obilježavanje dana Općine Drvar s obzirom da je tog dana 1995. godine potpisan Dejtonski mirovni sporazum.
- **Savez općina i gradova FBiH** pristupa u članstvo **Kongresa lokalnih i regionalnih vlasti Vijeća Evrope (CLRAE)** od novembra 1994. godine.

